

宋十五家詩選

宋十五家詩選

東海陳訐

楊萬里

字延秀吉州吉水人紹興進士第爲零陵丞調張浚間正心誠意之學遂自名其室曰

誠齋歷官國學太常轉將作少監出知漳州改常州尋提舉廣東常平茶鹽淳熙中以地震應詔上書後東宮官闕擢侍讀歷樞密院檢詳守右司郎中遷左司郎中以議配餐忤孝宗出知筠州光宗召爲秘書監尋出爲江東轉運副使總領淮西江東朝議行鐵錢萬里不奉詔改知贛州乞祠自是不復出韓侂冑嘗築南園屬萬里爲記許以板垣萬里曰官可棄記不可作侂冑權日盛憂憤成疾家人不敢進郎報忽族子自外至遽言侂冑用兵事萬里慟哭失聲亟呼紙書侂冑奸臣謀危社稷吾頭顱如許報國無路惟有孤憤又書十四言別妻子筆落而逝年八十三諡文節詩有誠齋江湖等集劉後邨云放翁學力也似杜甫誠齋天分也似李白誠齋自序云詩始學江西既學陳

後山五字律既又學王半山七字絕句晚學唐人絕句後官荆溪忽若有悟遂謝去前學而後渙然自得

楊誠齋矯矯拔俗魄力又足以勝之雄傑排界有籠挫萬象之概攀韓頤蘓宜也誠齋詩集甚富然未免過於擺脫不但洗淨鉛華且粗服亂頭矣恐操觚家不事持擇墮入劣境故余於先生詩寧失之矜慎爲後學防溫觴卽先生亦別開生面矣

考試河南漕司南歸值雨

我亦知吾生有涯長將病骨抵風沙天寒短日仍爲酒日莫長亭未是家又苦征夫催去去更甘風雨故斜斜舊聞行路令人老便恐霜花一半加

題湘中館

清境故應好新寒殊不勝征衣愁著盡凭檻喜猶能亂眼

船離岸關心山見稜箇中有句在下語更誰曾

普明寺見梅

城中忙失揆梅期初見僧牕一兩枝猶喜相看那恨晚故
應更好半開時今冬不雪何關事作伴孤芳却欠伊月落
山空正幽獨慰存無酒且新詩

除夕前一日歸舟夜泊曲渦市宿治平寺

江寬風緊折綿寒灘多岸少上水船市何曾遠船不近意
已先到燈明邊夜投古寺衝泥入溼薪燒作蟲聲泣冷牕
凍壁更成眠也勝疎篷仰見天市人歌呼作時節詩人兩
膝高於頰還家兒女問柯如明日此懷猶忍說

別教授吳景衡

名處州人

道合從人笑情親覺別難得朋何恨晚到老幾相看世路
今逾窄吾徒却自寬此心各相勉不但道加餐

和仲良春晚卽事

欲與東風說休吹墮絮飛吾行正無定魂夢豈忘歸花暖
能醺眼山濃欲染衣只嫌春已老此景也應稀

題唐德明建一齋

城南前江後山址竹齋正對寒江啟不嫌漁火亂書燈只
苦櫓聲驚睡美平生刺頭鑽故紙晚知此事無多子從渠
散漫汗牛書笑倚江楓弄江水

夜離零陵以避同寮追送之勞簡諸友

思歸日日只空言一棹今真水月間半夜猶聞郡樓鼓明

朝應失永州山

明發新塗晴快風順約泊漳鎮

雨到中宵歇心知逗曉晴排雲數峯出漏日半江明風借輕帆便天催懶客行不應樟鎮酒無意待人傾

送王監簿民瞻南歸

庭珪

潮頭打雲雲不隔月波潑臆臆欲流夜寒報晴豈待曉天公端爲盧溪老盧溪在山不知年盧溪出山卽日還黃紙苦催得高卧青霞成癖誰能那詔謂先生式國人掉頭已復烟林溪路傍莫作兩疏看老儒不用橐中金

和周仲覺三首

書懶聊遮眼詩窮只掉頭寒醒非不睡薄醉奈何愁火細

霜還重風停葉自投半生灾疾裏誰遣未休休
月淡猶明樹霜嚴不剩雲天寒一鴈叫夜半幾人聞詩只
令吾瘦清聊與子分頻來仍恨少此去更離羣
春在梅邊動寒從月外來貧如螢不暖心與燭俱灰此意
悠悠著從誰細細開病來更憂患淚盡但餘哀

乙酉社日偶題

愁邊節裏兩相關茶罷呼兒檢曆看社日雨多晴較少春
風晚暖曉猶寒也知散策郊行去其奈緣溪路未乾綠暗
紅明非我事且尋野蕨作蔬盤

和昌英叔久雨

積雨今晨也解休殷勤日脚傍花流半明衣桁收梅潤全

爲農家放麥秋更著好風墮清句不知何地頓閑愁新晴
佳處無人會隔柳一聲黃栗留

憫旱

鳴鳩喚雨如喚晴水車夜啼聲徹明乖龍嬾睡未渠醒阿
香推熱呼不磨下田半溼高全圻幼秧欲焦老差碧書生
所向便四壁賣漿逢寒步逢棘還家浪作飽飯謀買田三
歲兩無秋一門手指百二十萬斛量不盡窮愁小兒察我
慘不樂旋沽邨酒聊相酌更哦子美醉時歌焉知餓死捐
溝壑水車啞啞止復作

和蕭伯和韻

桃李何忙開又零老懷易感掃還生畧無花片經人眼誰

道春風不世情睡去恐遭詩作祟愁來當遣酒行成子能
覓句庸非樂未必胸中有不平

將至醴陵

行盡崎嶇峽初逢熨帖波寒從平野有雨傍遠山多也自
長沙近其如此路何披文渾不惡凍手奈頻呵

過安仁岸

野水上穿石疎林不掩巢雨蒲拳病葉風篠禿危梢短脰
知難續長腰強自抄茲遊良不惡物色困詆嘲

白沙買船晚至嚴州

重霧凝朝雨斜陽竟晚晴萬山江外盡一塔嶺尖明身小
寧嫌窄途長已倦行子陵臺下水未酌意先清

送客既歸晚登清心閣

誰不知儂懶其如送客何
葉聲和雨細山色上樓多
出處俱爲累昇沉儘聽他
疎鐘暮相答也解說愁麼

飯罷登山

樹遠通鶯響花晴帶雨痕
登山偶回首隔水見前邨
澹在孤無伴清歸笑不言
還家更遲著松菊未應存

臘後

雲暗虛疑暮江空分外寒
如何山雨過便爾岸沙乾
奈此詩愁得懷哉歲事闌
梅殘吾更忍不折一枝看

立春前一夕

春忽明朝是冬將半夜非
年華只不住客子未能歸
微霰

疎還密寒簷滴又稀
撚鬚真浪苦呵筆更成揮

霰

雪花遣霰作前鋒
勢頗張皇欲暗空
歸瓦巧尋疎處漏
跳堦誤到暖邊融
寒聲帶雨山難白
冷氣侵人火失紅
方訝一冬暄較甚
今宵敢嘆卧如弓

和司法張仲良醉中論詩

名林山東人

相過寧嫌數未行
先畏辭要寬
千里別猶費數篇
詩意得翻難售
聲希只自奇
此生詩社裏
三折或知醫

題唐德明秀才玉立齋

名人鑑

坡云無竹令人俗
我云俗人正累竹
玉立齋前一萬竿
能與主人相對寒
看竹哦詩筆
生力山童怪予遽
忘食不但

不可一日無斯須無此看何如詩成欲寫且復歇恐竹嫌
詩未清絕丁寧一竿不可除竹亦何曾減風月

謝唐德明惠笋

高人愛笋如愛玉忍口不餐要添竹云何又遣十輩來昏
花兩眼爲渠開販夫束縛向市賣外強中乾美安在錦紋
猶帶落花泥不論燒煮兩皆宜猪肝累人真可作以笋累
公端不惡

再病書懷呈仲良

病身誰伴亦誰憐贏得昏昏幾覺眠睡起不知身是病踞
牀看盡水沉烟

病中嫌雨又嫌晴自是情懷未苦平兩日雨多端不惡市

聲洗盡只簷聲

又題寺後竹亭

行盡空房忽盡闌竹光和月入亭寒壁間題字知誰句醉
把殘燈子細看

午憩東塘近白干江西地盡於此

日以秋還短塗緣熱故長也知茅店小奈此竹風涼更遠
終然到而吾有底忙欲行猶小駢咫尺便他鄉

曉泊舟廟山

平水長先曉無風也自濤烟昏山易遠岸澗樹難高去雁
鳴相報游魚冷總逃輕寒客可忍清眺得辭勞

雪後晚晴四山皆青惟東山全白賦最愛東山晴後

雪絕句

只知逐勝忽忘寒
小立春風夕
照間最愛東山晴
後雪軟
紅光裏湧銀山

永和遇風

未嫌春晚不多花
只愛青原綠似瓜
剩欲開懷納巖壑
可堪病眼著風沙
待船小立看鷗沒
倚杖微吟儘帽斜
客裏更無詩遣興
不愁兩鬢不成華

次昌英主簿叔晴望韻

秋水冬全落
寒梅暖向榮
烟林明又滅
風雁仄還平
老豈愁能避
貧非懶不營
猶須鏟千嶂
剩與放雙明

丙戌上元後和昌英叔李花

春煖何緣雪壓山香來初認李花繁露酣月蕊蒼茫外梅
與山攀伯仲間剩雨殘風底無賴明朝後日不堪看泥淡
小忍春游脚猶遣青童去一攀

寄題劉元明環翠閣

一夜春淡惱并桐夢回得句寄西風詩成却問題詩處正
在東山東復東

小雨

雨來細細復疎疎縱不能多不肯無似妬詩人山入眼千
峰故隔一簾珠

題赤孤同亭館

數菊能令客眼明三峰端爲此堂橫僕夫不敢催僮去只

道長沙尚八程

和羅巨濟山居

只擁書千卷何須屋萬間
新堂傍溪水大字署蓬山
恰有乘風客來分半日閑
自煎蝦蟹眼同淪鷓鴣班

園花皆手植梅蕊獨禁寒
色與香無價飛和雪作團
數枝橫翠竹一夜遶朱闌
不惜吟邊苦收將句裏看

送鄒元升歸安福

我昔見子廬溪南烟如玉
露照晴嵐子今訪我南溪北
稟如綠驥成骨骼袖中文字
細作行讀來病眼生寒光
尖新句子人時樣故應破
陣翰墨場春風春雨春山路
喜子能來愁子去故人一別
二十年且對青燈夜淡語

除夕前一日絕句

雪留遠嶺半尖白雲漏斜陽一線黃
天肯放晴差易得殷勤剩覓幾朝霜

已丑上元後晚望

雪裏晴偏好寒餘煖尚輕山烟春自起
野燒暮方明又是元宵過端令病骨驚
遣愁聊覓句得句却愁生

初秋暮雨

禾穗輕黃尚淺青邨春已報隔林聲
忽驚暮色翻成曉仰見雙虹雨外明

豐中小憩

歸路元無遠行人倦自迷野香寒蝶聚
秋色老楓知得得

逢清蔭休休憇片時江山豈無意邀我覓新詩

寄張欽夫

工瑟曾緣利鳴琴豈負予髮於貧寒白詩亦病來疎知己
俱霄漢孤踪且簿書三年知免矣一飽會歸歟

歸自豫章復過西山

一眼苔花十里明忽疑九月雪中行我行莫笑無騁從自
有西山管送迎

夜宿楊溪曉起見雪

茆簷無聲風不起誤喜夜衰雨應止開門送眼忽心驚失
却前山萬堆翠江南只說浙西山更令著雪與人看諸峰
盡處一峰出凜然玉立最高寒溪聲細伴吟聲苦客心冷

言言集
九
趁波心去掉頭得句恐人嗔且喚征夫問前路

西湖晚歸

際晚遊人也合歸西船猶自弄斜暉西湖兩岸千株柳絮不因風爰自飛

送丁子章將漕湖南

半世行天下同心寡友生故人今又去此意恂誰傾白髮三更語青燈一點明看渠還玉署老我正歸耕

甲午出知漳州晚發船龍山暮宿桐廬

一席清風萬壑雲送將華髮得歸身海潮也怯桐江淨不遣濤頭過富春

山居

鬢禿猶云少書多却道窮柴門疎竹處茅屋萬山中幽夢
時能憶閑題底要工不知蟬報夏爲復自吟風

釣雪舟

青鞋黃帽綠簑衣釣雪舟中雪正飛歸自嚴州無一物扁
舟載得釣臺歸

郡中送春盤

餅如繭紙不可風菜如縹茸劣可縫韭芽捲黃苣舒紫蘆
菹削冰寒脫齒卧沙壓玉割紅香部署五珍訪詩腸野人
未見新曆日忽得春盤還太息新年六十奈老何霜鬢看
鏡幾許多麴生嗔人不解事且爲春盤作春醉

臘裏立春蜂蝶輩出

嫩日催青出凍菱小風吹白落疎梅殘冬未放春交割早
有黃蜂紫蝶來

宿小沙溪

樹補山烟補缺雲風搖花雨作香塵綠楊儘道無情著何
苦垂條拂路人

雪夜尋梅

去年看梅南溪北月作主人梅作客今年看梅荆溪西玉
爲風骨雪爲衣臘前欲雪竟未雪梅花不慣人間熱橫枝
憔悴凝晴埃端令羞面不肯開縞裙夜訴玉皇殿乞得天
花來作伴三更滕六駕海神先遣東風吹玉塵梅仙曉沐
銀浦水冰膚別放瑤林春詩人莫作雪前看雪後精神添

一半

小飲俎豆頗備江西淮浙之品戲題

滿盤山海眩芳珍未借前籌已噉津
鱖醬子魚總佳客玉狸黃雀是鄉人

味含霜氣洞庭柑鮓帶桃花楚水鱖
春煖著人君會否不教淮白過江南

春煖郡圃散策

已覺朝來退袂衣日光風力軟如癡
倩誰畱許春寒著更放梅花住少時

燒香七言

琢瓷作鼎碧於水削銀爲葉輕如紙
不文不武火力勻閉

閣下簾風不起詩人自炷古龍涎但令有香不見烟素馨
忽開抹利拆低處龍麝和沉檀平生飽識山林味不奈此
香殊斌媚呼兒急取烹木犀却作書生真富貴

二月十四日梅花

雨打知無那春暄絕不禁小風千點雪落日一鬚金樹勁
春猶瘦花寒暮更明平生豈無句此外不須清

送羅永年西歸

梅萼香邊踏雪來杏花雨裏帶春回明朝解纜還千里今
日看花更一杯誰遣文章太驚俗何緣塲屋不遺才南溪
鷗鷺如相問爲報春吟費麝煤

讀唐人及半山詩

不分唐人與半山無端橫亂對詩壇
半山便遣能參透猶有唐人是一關

清明果飲

南溪清酒碧於江北地鵝梨白似霜
顏却老人山作玉更加食邑醉爲鄉
春光如許天何負雨點殊疎燕不妨
絕愛杞萌如紫蕨爲烹茗椀洗詩腸

秋懷

隨分哦詩足散愁老懷何用更冥搜
聿來胥宇蟻移穴無以爲家燕入秋
蓋世功名吹劒首平生憂患斲矛頭
從今歸去便歸去未到無顏見白鷗

晚登淨遠亭

簿書纔了晚衙催
且上高亭眼暫開
野鴨成羣忽驚起
定知城背有船來

迂使客夜歸

去時岸樹日猶明
歸到舟橋月已昇
水與天爭一輪月
市聲人語兩街燈
迎來送往鬚成雪
索筆題詩研欲冰
淨洗紅塵煩碧酒
倦來不覺捶騰騰

病後霜威不見饒
吟邊月色苦相撩
重簾垂地寒猶入
盡燭無風影自搖
誰遣塵埃空老去
何曾鷗鷺不吾招
坐來已是愁無奈
草露蟲聲政寂寥

病身已怯九秋涼
也復移樽下砌傍
只愛杯中都是月
不知身上幾多霜
清愁舊覺天來遠
寒夜新添歲樣長
不是

傍人俱欲睡老人無睡亦何妨

毘陵郡齋追憶鄉味

坐無黃雀牛尾狸荆溪日日思江西若無鵝梨與海錯江
西却恐思荆溪舊居江西不自惜到得荆溪却追憶明年
官滿歸江西却憶荆溪再難得江珍海錯各自奇冬裘何
曾羨夏絺鵝梨黃雀無不可荆溪江西不關我

齋房戲題

長瓶舉我充自代短檠留人爲莫逆醉鄉無日不瓜時書
圃何朝無菜色欲從舉者便彈冠回顧石交難對席子墨
客卿善運籌更問渠儂決去留墨卿轉問子虛子欲說還
忘一笑休

以糟蟹洞庭甘送丁端叔端叔有詩因和其韻

斗州只解寄鵝毛鼎肉何曾饋百牢驅使木奴供露粳催
科郭索獻霜螯鄉封萬戶只名醉天作一丘都是糟却被
新詩太清絕喚將雪虐更風饕

蠟梅

渠玉圓彫蕾金鐘細著行來從真蠟國自號小黃香夕吹
撩寒馥晨曦透煖光南枝本同姓喚我作他楊

梅露堂燕客夜歸

藥玉船中酒似空水沉烟上雪都融梅堂客散人初靜椽
燭燒殘一尺紅

郡圃杏花

小樹嫣然一兩枝
晴醺雨醉總相宜
纔憐欲白仍紅處
政是微開半吐時
得幸東風無忌對
主張春色更還誰
海棠濃麗梅花淡
匹似渠儂別樣奇

迥出千花合
受降不然受拜亦何妨
行穿小樹尋晴菜
自挽芳條嗅煖香
却恨來時差已晚
不如清曉看新粧
朗吟清露溫風句
惱殺詩翁只斷腸

芥虀

苴薑馨辣最佳蔬
蓀芥芳心不讓渠
蟹眼嫩湯微熟了
鵝兒新酒未醒初
棖香醅釀作三友
露葉霜芽知幾鋤
自笑枯腸成破甕
一生只解貯寒菹

夜泊平望終夕不寐

櫻桃湖裏月如霜
偏照征人寸斷腸
醉裏不知家尚遠
夢回忽覺路初長

舟中小雨

漠漠輕寒粟脫膚
餘醺半落牡丹初
顛風無賴難拘管
小雨多情爲破除
半世光陰行路裏
一年春事客愁餘
浙西尚遠江西在
何日漳濱買白魚

江山道中蠶麥大熟

黃雲割路幾肩歸
紫玉炊香一飯肥
却破麥田秧晚稻
未教水牯卧斜暉

新晴戶戶有歡顏
曬繭攤絲立地乾
却遣縑車聲獨怨
今年不及去年閑

小憩二龍爭珠蓋兩長嶺夾一圓峰故名自此出官
路入山路云

田路直復縈肩輿斜還正如何晴三日猶自滑一徑缺岸
有危棧方軫無穩輿不跌先獨驚稍坦溪自慶肯信坐者
安不及行者病昨來九軌塗可思不可更忽逢兩蒼虬爭
此一照乘頗欲問故老雙爭誰孤勝水聲亂入語一辭無
真聽輕風從秧疇衆綠久未定崎嶇從此始辛苦何時竟
早炊楊家塘

枯樹藤爲葉遙峰石作鬟如何每行客不勸自加餐浙界
殘零處江東咫尺間炊烟戀茅店飛出却飛還

四月四日午初出浙東界入信州永豐界

外面千峯合中間一徑通日光自搖水天靜本無風邨酒
停春綠林花倦午紅莫欺山猴子知我入江東

出永豐縣西石橋上聞子規

花愁月恨只長啼雨夕風晨不住飛自出錦江歸未得至
今猶勸別人歸

四月十三日渡鄱陽湖

湖心一山曰康郎山
其狀如蛭浮水上

泊舟番君湖風雨至夜半求濟敢自必苟安固所願孤愁
知無益暫忍復永歎夜久忽自睡倦極不知旦舟人呼我
起順風不容緩半篙已湖心一葉恰鏡面仰見雲衣開側
視帆腹滿天如瑠璃鐘下覆水晶椀波光金汁瀉日影銀
柱貫康山杯中蛭廬阜帆前幔豁然地無帶渺若海不岸

是身若虛空。御風游汗漫。初憂觸危濤。不意拾奇觀。近歲
六暄涼。此水三往返。未涉每不寧。旣濟輒復玩。游倦當自
歸。非爲猿鶴怨。

已至湖尾望見西山

好風穩送五湖船。萬頃銀濤半霎間。已入江西猶未覺。忽
然對面是西山。

蘆荻中間一巷深。萋蒿如柱不成簪。正愁半日無邨路。遠
有人家在樹林。

中秋病中不飲

去年兩浙浙西州。今夕南溪溪上頭。滿著玻璃一盆水。洗
開玉鏡十分秋。病來不飲非無酒。老去追歡總是愁。自笑

獨醒仍苦詠枯腸雷轉不禁搜

中秋月長句

西山走下丹砂丸東山飛上黃金盤
徑從碧海升青天半溼尚帶波濤寒
初輝淡淡寒不動月華猶輕桂華重
黃羅團扇暗花紋蹙金突起雙龍鳳
須臾正面天中央銀鉦退盡向來黃
乾坤鎔入冰壺裏萬象都無只有光
平生愛月愛今夕古人與我同此癖
去年中秋天漆黑今年中秋月雪白
先生舊不論升斗近來畏病不飲酒
月中醒眼搔白首明年月似今宵否

寄題李與賢似剡庵

四明狂客一茅屋勅賜剡川纔一曲
安福詩人李與賢大

書似剡山扉。我曾著脚勾踐國。奉詔昭陵省松柏。是時
八月欲半頭。鏡湖不是人間秋。嵇山影落水精闕。荷花露
滴波中月。季真茅屋荒蒼苔。古木哀猿啼禹穴。今君結屋
阿那邊。正似剡川若箇言。我到剡川君未到。似和不似然
不然。君不見興公舊艸天台賦。元不曾識天台路。一俛仰
間已再升。何用瘦藤與芒屨。

克信弟坐上賦梅花二首

對酒初驚髮半華。折梅還覺興殊佳。如何屋角西南月。只
照梢頭一兩花。自是向來香寂寞。不須更道影橫斜。口枝
別有春無價。和靖何曾覓得些。

月波成露露成霜。借與南枝作淡粧。寒入玉衣燈灺薄。春

撩雪骨酒邊香却於老樹半枯處忽走一梢如許長道是
疎花不解語伴人醒醉替人狂

十二月二十七日大雪中過言水小盤渡西歸

風卷寒江浪溼天斜吹亂雪忽平船碧琉璃上瓊花裏獨
載詩人孟浩然

庚子正月五日曉過大臯渡

霧外江山看不真只憑雞犬認前邨渡船滿板霜如雪印
我青鞋第一痕

過皂口

顛石三百里春流十八灘路從青壁絕船到半江寒不是
春光好誰供客子看猶須一樽綠併遣百憂寬

曉過皂口嶺

夜渡驚灘有底忙
曉攀絕磴更禁當
周遭碧嶂無人迹
圍入青天小冊方
半世功名一雞肋
平生道路九羊腸
何時上到梅花嶺
北望螺峯半點蒼

步過分水嶺

路險勞人役
僂須下轎行
石從何代落
蕨傍舊根生
古樹無今態
幽泉有暗聲
只言章貢近
猶自兩三程

題南雄驛外計堂

攜家度嶺夜乘槎
小泊淩江水北涯
二月山城無菜把
一年春事又楊花
舉頭海國星辰近
回顧梅山艸樹遮
客子相逢聞好語
看山只欠到南華

二月二十三日南雄解舟

水沒蒲芽尚有梢風吹屋角半無茅急灘未到先聞浪枯
樹遙看只見巢

小泊英州

人人藤葉嚼檳榔戶戶茅簷覆土牀只有春風不寒乞隔
溪吹度柚花香

晨炊光口砦

泊船光口薦晨炊野飯匆匆不整齊新摘柚花薰熟水旋
撈蒿苣浥生蠶儘教坡老食無肉未害山公醉似泥過了
真陽到清遠好山自足樂人饑

船中蔬飯

食蕨食臂莫食拳食笋食梢莫食根何曾萬錢方下箸先生把菜亦飽去嶺南風物似江南笋如束薪蕨作籃先生食藉幾萬卷千巖萬壑皆厨傳

宴客夜歸六言

月在荔枝梢上人行茉莉花間但覺胸吞碧海不知身落南蠻

送蔡定夫赴湖南提刑

菊後霜前換繡衣湘南嶺北看梅枝還將方策汗青路拈出園扉艸綠時四海幾人憐我老三年兩作送君詩借令貴殺衡陽紙半幅無妨慰夢思

辛丑正月二十五日游蒲澗晚歸

桃李淡酣日池塘淺試春霽暉搖遠水新暖軟遊人生酒
清無色青梅脆有仁烟鐘能底急催我入城闔

食車螯

珠宮新沐淨瓊沙石鼎初燃淪井花紫殼旋開微滴酒玉
膚莫熟要鳴牙根拖金線成雙美薑擘糟丘總一家老子
宿醒無解處半杯羹後半甌茶

連天觀望春憶毘陵翟園

中秋節候社前時春到園林最晚枝弄水不冰搗扇手登
臺猶粟向風肌烏烏聲裏山光溼花柳陰中日脚遲北望
翟園春正開海棠錦繞雪茶蘼

二月十三日謁兩廟早起

起來洗面更焚香粥罷東牕未肯光古語舊傳春夜短漏
聲新覺五更長近來事事都無味老去波波有底忙還憶
山居桃李晚醺醺爲枕醉爲鄉

春晴懷故園海棠

故園今日海棠開夢入江西錦繡堆萬物皆春人獨老一
年過社燕方回似青如白天濃淡欲墮還飛絮往來無奈
春光餐不得遣詩招入翠瓊杯

竹邊臺榭水邊亭不要人隨只獨行乍暖柳條無氣力淡
晴花影不分明一番過雨來幽徑無數新禽有喜聲只欠
翠紗紅映肉兩年寒食負先生

予去年正月離家之官
蓋兩年不見海棠矣

初食笋蕨

魚鳳烹龍世浪傳，猩脣熊掌我無緣。
只逢笋蕨杯盤日，便是山林富貴天。
穉子玉膚新脫錦，小兒紫臂未開拳。
只嫌嶺外無珍饈，一味春蔬不直錢。

明發青塘蘆包

青塘無店亦無人，只有青蛙紫蚓聲。
蘆荻葉深蒲葉淺，荔枝花暗楝花明。
船行兩岸山都動，水入諸邨海旋成。
回望月臺烟雨外，萬峯盡處五羊城。

明發陳公徑過摩舍那灘石峯下

遙松烟未消，近竹露猶滴。
石峰矜孤銳，喜以江自隔。
清潭涵曉紫，碧岫過雲白。
回瞻宿處隄，路轉不可覓。
地迫人絕影，山僻虎留跡。
下有無底潭，上有欲落石。
是間一徑橫，夾

以萬松直樹從何時有陳公所手植陳公今焉在徑松自
寒碧

澄潭湧晴暈不風自成花回流如倦客出門復還家江晴
已數日新漲沒舊沙知是前溪雨溼雲尚橫斜山轉江亦
轉江行山亦行風鬟照玉鏡素練縈青屏我本山水客澹
無軒冕情塵中悔一來事外懷孤征忽乘滄浪舟仰高俯
淡清餐翠腹可飽飲淥身須輕鷗鵠不相識還作故園聲
危峰瑩無土平地岌孤石如何半巖間亦有小樹碧走空
根苦辛倚險幹寒瘠芳蘭間叢生紫蕤濯幽色近香許世
聞遠秀絕人摘而我雲外身方茲喟行役

題望韶亭

新隆寺後看韶石三三兩兩各依稀金坑津頭看韶石十
十五五不整齊一來望韶亭上看九韶八音堆一案金鐘
大鏞浮水涯玉瑟瑤琴倚天半堯時文物也麓疎禮樂猶
帶鴻荒餘茅茨殿上槌土鼓韋籥聲外無笙竽黃能郎君
走川嶽領取后夔搜禮樂澤山桐樹半夜鳴泗水石頭清
晝躍山祇川后爭獻珍姚家制作初一新帝思南嶽來時
巡宮琛廟寶皆駿奔曲江清徹碧瓊軟海山孤尖翠屏展
天顏有喜后夔知一奏雲韶供亞飯帝登九疑忘却歸不
知斑盡湘笛枝后夔一脛跛莫隨坐委衆樂江之湄儀鳳
舞獸掃無迹獨畱一後守其側至今喚作獅子石雨淋日
炙爛不得洞庭張樂已莓苔健爲獲磬亦塵埃不如九韶

故無恙憂擊尚可冬起雷何時九秋霜月裏來聽湘如瑟
聲美曲終道是不見人江上數峯是誰子

謝木蘊之舍人分送講筵賜茶

吳綾縫襲染菊水蠻沙塗印題進字淳熙錫貢新永芽天
珍誤落黃茅地故人驚渚紫微郎金華講徹花艸香宣賜
龍焙第一綱殿上走趨明月璫御前燬罷三危露滿袖香
烟懷璧去歸來拈出兩蜿蜒雷鳴晦冥驚破柱北苑龍芽
內樣新銅圍銀範鑄瓊塵九天寶月霏五雲玉龍雙舞黃
金鱗老夫平生愛煮茗十年燒穿折脚鼎下山汲井得甘
冷上山摘芽得苦梗何曾夢到龍遊窠何曾夢喫龍芽茶
故人分送玉川子春風來自玉皇家鍛圭椎壁調冰沐烹

龍魚鳳搜肝髓石花紫笋可衙官赤印白泥牛走爾故人
氣味茶樣清故人丰骨茶樣明開緘不但似見面叩之咳
唾金石聲麴生勸人墮巾幘睡魔勸我拋書冊老夫七梳
病未能一啜猶堪坐秋夕

九日郡中送白菊

未應白菊減於黃金作鈿心玉作裳一夜西風開瘦蕾兩
年南海伴重陽若言佳節如常日爲底寒花分外香按蕊
浮杯莫多著一枝畱插鬢邊霜

潮陽海岸望海

動地驚風起海陬爲人吹散兩眉愁身行島北新春後眼
到天南最盡頭衆水更來何處著千峰赴此却回休客間

供給能消底萬頃烟波一白鷗

食蛤蜊米脯羹

傾來百顆却盈奩剝作杯羹未屬厭莫遣下鹽傷正味不
曾著蜜若爲甜雪指玉質全身瑩金緣冰鉶半鏤纖更浙
香杭輕摻却發揮風韻十分添

正月三日宿范氏莊

山歷愁寡天沙征恨多地兩日行海濱雖近彌不至遐瞻
道旁堠我進渠祗退大風來無隔午燠皎安避今夕范氏
莊初覲三峯翠愈遠故絕遐不多始足貴巉然半几出蹙
若一拳細輕霏淡晚秀隤照燁春媚玩久有餘佳繪苦未
必似今夕勿掩扉月中對山睡

南華道中

清曉新晴物物熙
小風淡日暖歸旗
不堪回首南華路
去歲梅花細雨時

曉霧

不知香霧溼人鬚
日照鬚端細有珠
政是春山眉樣翠
被渠淡粉作糊塗

曉晴過猿藤逕

厭雨欣初霽
貪程敢晏眠
排天雙壁起
受日一峰先
入逕惟逢樹
無人況有烟
藤深猿不見
聲到客愁邊

明發龍頭

黑甜偏至五更濃
強起侵星敢小慵
輸與山雲能樣懶
日

高猶宿夜來峰

夜宿房溪飲野人張珣家桂葉鹿蹄酒其法以桂葉
爲餅以鹿蹄煮酒釀以八月過是期味減云

桂葉揉青作麴投鹿蹄煮醪趁涼瀉落杯瑩滑水中水過
口森嚴菊底秋玉友黃封猶退舍蒸湯蜜汁更輸籌野人
未許傳醅法剩買雙餅過別州

宿南嶺驛

蕨手猶拳已箸長菊苗初甲可羹嘗山邨富貴無人享一
路春風野菜香

二月望日遞宿南宮和尤延之左司郎署疎竹之韻
鮑君見我眼猶青笑我銀髭雪點成憶昔與君同舍日感

渠將雨作秋聲夜來遞宿三更悄葉底春寒一倍生夢入
故園數新笋籬邊破蘚幾莖橫

謝胡子遠郎中惠蒲大韶墨報以龍涎心字香

墨家者流老蒲仙碧梧採花和麝烟華陽黑水煎膠漆大
陰玄霜作肌骨龍尾磨肌飲鼠鬚落點髹几几不如夷甫
清瞳光蔽日一見墨卿驚自失後來夔州有梁杲爾來黔
川有吳老亦追時好得時名竟爲蒲生豎降旌吳墨往往
玄尚白梁墨溼溼鵝黏壁南宮先生來自西惠然贈我四
玄圭我無鵠返鸞回字我無金章玉句子得君此贈猶何
似兀者得韓偓得髭安得玉案雙鳴珎金刀繡段底物價
送以龍涎心字香爲君興雲繞明牕

和章德茂少卿拉館學之士四人訪王德修提幹之
作

西玉南金價則同帝城相對落花風人如天上珠星聚談
到樽中竹葉空白紵烏紗青寶玦紫鸞黃鵠碧梧桐千齡
此邁還孤往恨殺燈前欠老翁

送何一之右司出守平江

十年一別再重遊又見魚書拜徵侯人物只今何水部風
流不減韋蘇州白蘋洲上春傳語烏鵲橋邊艸喚愁報政
不應遲五月鶯花紫禁竚歸舟

招陳益之李兼濟二主管小酌益之指蠶豆云未有
賦者戲作七言蓋豌豆也吳人謂之蠶豆云

翠莢中排淺碧珠甘欺崖蜜軟欺酥沙瓶新熟西湖水漆
搗親嘗曉露腴味與櫻梅三益友名因蠶繭一絲絢老夫
稼圃方雙學譜入詩中當稼書

以六一泉煮雙井茶

鷹爪新茶蟹眼湯松風鳴雪兔毫霜細參六一泉中味故
有涪翁句子香日鑄建溪當退舍落霞秋水夢還鄉何時
歸上滕王閣自看風爐自煮嘗

西府直舍盆池種蓮

西府寒泉汲十尋溪澆淺灑碧森森高花已照紅妝鏡小
苔新抽紫玉簪鉗破尚餘新雨恨繖疎纔作半池陰西湖
瘦得如盆大更伴詩人恐不禁

大音
簡

陳蹇叔郎中出閩漕別送新茶李聖俞郎中出平分
似

頭綱別樣建溪春小璧蒼龍浪得名細瀉谷簾珠顆露打
成寒食杏花楊鷓鴣斑枕面雲縈字兔褐甌心雪作泓不待
清風生兩腋清風先向舌端生

送張定叟

紫巖衣鉢付南軒介弟曾同半夜傳師友別來真夢耳江
湖相對各潸然但令門戶無遺恨何必功名在早年君向
瀟湘我閩粵寄書只在寄茶前

時予方上
章乞閩漕

行路難

君不見河陽花今如泥土昔如霞君不見武昌柳春作金

絲秋作帚人生馬耳射東風柳色桃花却長久秦時東陵
千戶侯華蟲被體腰蒼瑯漢初沛邑刀筆吏折腰如磬頭
槍地蕭相厥初謁邵平中庭百拜百不謗邵平後來謁蕭
相故侯一拜一惆悵萬事反覆何所無二子豈是大丈夫
窮通流坎皆偶爾搏扶朱必賢槍榆華胥別是一天地醉
鄉何曾有生死儂欲與君歸去來千愁萬恨付一杯

送林子方直閣秘書將漕閩部

梅花園裏荔枝邨頗記張燈作上元一別頻蒙訪生死七
年再見叙寒溫
鴈當閔雨祈羣望不得臨風共一尊誰爲
君王留國士吾衰猶擬叫天關

亦聞小泊贊公房清曉扶藜叩上方君與一僧遊別嶂我

行百匝造長廊風巾霧屨來雲外雪檜霜松滿袖香政是
炎官張火傘不應多取海山涼

題吳夢興古樂府

金麥寨帷銀蒜鈎水光殿後月華樓鴛歌花笑柳起舞何
處人間更有愁吳郎那得吳宮語夢裏苧蘿人道許低紅
揜翠曲未終小兒索飯啼門東

張功父請祠甚力簡以長句

老夫不及朱師古納却太常少卿得潼府老夫不及張約
齋乞得華州仙觀名雲臺金印如斗牀滿笏富貴何曾膏
白骨一世窮忙爲阿誰終日逢人皺兩眉賣身長鬚仍赤
腳忍向墻間乞東郭添丁德曜喜欲顛孤竹一簞真個錯

張君有宅復有田朱君歸去無一錢老夫老矣不歸去五
柳先生應笑汝

和張功父梅詩

今歲柴車總未巾孤山龍井不曾行老無半點看花意遮
莫明朝雨及晴

約齋句子已清圓更賦梅花分外妍不飲銷金傳玉手却
來嚙雪聳詩肩

夢種菜

予三月一日之夜夢遊故園課僕夫種菜若秋冬
之交者尚有菊也夢中得菜子菊花一聯覺而足
之

背秋新理小園荒過雨畦丁破塊忙菜子已抽蝴蝶翅菊
花猶著鬱金裳從教蘆葦專車大早覺蔓青撲鼻香宿酒
未消羹糝熟析醒不用柘爲漿

春雨呈袁起巖

昨日晴暄盡十分無端寒溼復今晨蒼顏華髮差排老急
雨顛風屏當春只有觀書堪遣日從來病眼不如人詩名
滿世真何用更賺先生願卜隣

曉泊蘭溪

金華山高九天半夜雪裝成珠玉案蘭溪水清千頃强朔
風凍作琉璃缸日光雪光兩相射病眼看來忘南北恨身
不如波上鷗脚指爲楫身爲舟恨身不如沙上雁蘆花作

家梅作伴折綿冰酒未是寒曉寒真欲冰我肝急閉簾蓬
擁爐去竹葉梨花十分注

和陳蹇叔郎中乙巳上元晴和

御柳梢頭晚不風官梅面上雪都融如何闔闔新春夜頓
有芙蓉滿眼紅十里沙河人最鬧三千世界月方中買燈
莫費東坡紙今歲黿山不入宮

十四日晚有旨
徹禁中山棚

沈虞卿秘監招遊西湖

蘓公堤遠柳生烟和靖園深竹映關船入芰荷香處去人
從雲水國中還似寒如暖清和在欲雨翻晴頃刻間龍爲
蓬萊老仙伯一杯痛快吸湖山

賀皇太子九月四日生辰

繼照姿天縱分陰學日勤
橘中招綺夏瓜處屏仵文老別
魚竿月來依鶴禁雲還將古爲鑑
聊當野人芹

九日卽事呈尤延之

昨日茱萸未苦香今朝籬菊頓然黃
浮英泛蕊多多著舊酒新醅細細嘗
節裏且追千載事簪邊管得幾莖霜
正冠落帽都兒態自笑狂夫老不狂

跋陸務觀劔南詩藁

今代詩人後陸雲天將詩本借詩人
重尋子美行程舊盡拾靈均怨句新
鬼嘯猿啼巴峽雨花紅玉白劔南春
錦囊繙罷清風起吹仄西牕月半輪

都下食笋自十一月至四月戲題

竹祖龍孫渭上居供饌樽俎半年餘斑衣戲綵春無價玉
版談禪佛不如若怨平生食無肉何如陋巷飯斯蔬不須
庾韭元修菜吃到憎時始憶渠

幼圃

蒲橋寓居庭有剝方石而實以土者小孫子藝花
窠菜本其中戲名幼圃

寓舍中庭劣半弓驚泥爲圃石爲墉瑞香萱艸一兩本葱
葉薺苗三四叢穉子落成小金谷蝸牛卜築別珠宮也思
日涉隨兒戲一徑惟看蟻得通

食雞頭子

三危瑞露凍成珠九轉丹砂鍊久如鼻觀溫芳炊桂歇齒

根熟軟剝胎餘半甌鷹爪中秋近一炷龍涎丈室虛却憶
吾廬野塘味滿山柿葉正堪書

寄題曾子與競秀亭

老夫上下蓼花灘每過君家輒繫船尊酒燈前山入座孤
鴻月底水連天喧涼書問二千里塲屋聲名三十年競秀
主人文似豹不應霧隱萬峰邊

人日出遊湖上

去時數點雨歸時數片雪雨雪兩不多山路雙清絕
去歲遊春屐苔痕故可尋人家隨岸遠塢影落湖渌

寄題劉成功錦里

嘉林市中虛一丈嘉林寺後竹千竿先君授徒竹牕底我

詞苑言選
初識君俱少年同師同舍同筆硯火冷燈青飛雪片春風
一夜吹林花南北飄零各星散我今頭白苦思歸羨君山
園芋栗肥爲君題作小錦里君應一笑巾墮几

過楊邨

石橋兩畔好人烟匹似諸邨別一川楊柳陰中新酒店葡
萄架底小漁船紅紅白白花臨水碧碧黃黃麥際天政爾
清和還在道爲誰辛苦不歸田

蘓木灘

灘雪清濺眸灘雷怒醒耳落洪翠壁立跳波碧山起船進
若戰勝船退亦遊戲若非篙師苦進退皆可喜忽逢下灘
舟掀舞快雲駛何曾費一棹纔瞬已數里會看上灘時得

意君勿恃

讀退之李花詩

桃李歲歲同時並開而退之有花不見桃惟見李
之句殊不可解因晚登碧落堂望隔江桃皆暗而
李獨明乃悟其妙蓋炫晝縞夜云

近紅暮看失燕脂遠白宵明雪色奇花不見桃惟見李一
生不曉退之詩

明發道經生米市隨喜西林寺留題進退格

貪睡能無起挑燈強未殘春聲忙野店月色淡柴門又踏
黃塵路前追紅葉邨秋衣那敢薄病骨自難溫

送吉州太守朱子淵造朝

公在鄉邦我在京有書終不慰生平西歸一見還傾蓋夜
坐相看話短檠老去可堪頻送客古來作惡是離情雲涯
隔斷從今始肯倩征鴻訪死生

宿蘭溪水驛前

繫纜蘭溪岸開襟柳驛牕人爭趨夜市月自落秋江燈火
疎還密帆檣隻更雙平生經此縣今夕駐孤幢
合眼波吹枕開篷月入船奇哉一江水寫此二更天剩欲
酣清賞翻愁敗醉眠今宵懷昨夕雨卧萬峰前

和陸務觀見和歸館之韻

君詩如精金入手知價重鑄作鼎及鼎所向一一中我如
驚並驥夷塗不應共難追紫蛇電徒掣青絲輕折膠偶投

漆異榻豈同夢不知清廟茅可望明堂棟平生憐坡老高
眼薄蕭統渠若有猗那心肯師晉宋被琴聊再行新笛正
三弄因君發狂言湖山春已動

丹陽舍舟登陸渡江

小泊樓船鐵甕城匆匆又作絕江行看他蠟燭幾回剪聽
盡鷄聲不肯明水底霜寒還十倍夜來月上恰三更篙師
好事君知否江面侵晨鏡樣平

過太湖石塘二首

每過松江得偉觀玻璃盆底釘乾坤天邊島嶼空無際烟
外人家淡有痕笠澤古今多浪士包山近遠在何邨季鷹
魯望何曾死雪是衣裳月是魂

兀坐船中只欲眠不如船外看山川松江是物皆詩料蘭
漿穿湖卽水仙將取垂虹亭上景都歸却月觀中篇正綠
王事游方外鑿齒彌天未當賢

過平望

行得三吳徧清漪最是蕪樹圍平野合水隔別邨孤震澤
非塵世松陵是西圖更添一詩老載雪過重湖

秀州嘉興館拜賜春幡勝

中使傳宣下紫宸鏤頭濃染御香雲綵幡耐夏宜春字寶
勝連環曲水紋癡似土牛鞭不動老登金馬槐無聞強簪
華髮知難稱只有新詩頌萬分

幡勝用
銀頭紙貼

泊舟臨平

前廳向市下却簾後廳臨水開却門岸頭楊柳報春動溪
底雲天隨浪翻隔溪數間黃艸屋繞屋千竿翠瓊竹三老
鳴鉦攜柁樓今宵又向臨平宿

過臨平蓮蕩

蓮蕩層層鏡樣方春來嫩玉斬新黃角頭一一張蘆箔不
遣魚蝦過別塘

蓮蕩中央劣露沙上頭更著野人家籬邊隨處插垂柳簷
下小船縈釣車

朝來採藕夕來魚水種菱荷岸種蘆寒浪落時分作蕩新
流漲後合成湖

人家星散水中央十里芹蕖菰飯香想得薰風端午後荷

花世界柳絲鄉

謝王恭父贈梁杲墨

君不見蜀人文字天下工前有相如後楊雄君不見蜀人
烏丸天下妙前有蒲韶後梁杲初得梁墨穉摹糊老夫道
梁不及蒲蓬山藏室王校書笑我未識真玄菟兩圭水蒼
笏雙團點漆璧一併贈老夫此意已金石涖州綠玉試松
花星潭黑雲走風沙龍蛇起陸鷹入骨却愁雷電奪神物
麥

無端綠錦織雲機全幅青羅作地衣此是農家真富貴
花銷盡麥苗肥

過平望

望中不著一山遮四顧平田接水涯柳樹行中分港汊竹
林多處聚人家風將春色歸沙艸天放晴光入浪花午睡
起來情緒惡爭呼蟹眼淪龍芽

月夜阻風泊舟太湖石塘南頭

過湖未得匹如閑何幸湖心泊画船宇宙中間都是月波
濤外面更無天誰知造物將奇觀不與他人付謫仙管領
渠儂無一物鏤冰剪雪作新篇

贈寫真水鑑處士王溫叔

我不如森森千丈松我不如濯濯春月柳髯疎鬢禿已雪
霜皮皺肉皺真老醜葉生画時顏尚朱王生画時骨更癯
一生愛山吟不就兩肩化作秋山瘦君不見褒公鄂公圖

瘦烟腰間羽箭大如椽君不見浣花醉圖粉墨落日斜泥
滑驢失腳貴人寒士兩相嗤面圖猶在人已非王生王生
且停手不如生前一杯酒

又追和功父病起寄謝之韻

霜何曾傍繡簾寒酒不能令客臉丹勤向竹爐溫手脚嬾
尋銅鏡整衣冠無人孤坐月將落擁鼻清吟夜向闌忽憶
約齋詩債在自吹燈火起來看

湖天春景

湖面黏天不見堤湖心菱葑水周圍暮鴻成陣鴉成隊已
落還飛久未棲

賦金盤露椒花雨

吾家酒名敷腴者曰金盤露芳烈者曰椒花雨
金盤夜貯雲表露椒花曉滴山閒雨一涓不用鳴綠波雙
清釀出鵝黃乳老妻知我憎官壺還家小槽壓真珠江西
擔取來西湖遣我醉倒不要扶更攜數樽往淮上要夸親
舊藏家釀祗堪獨酌不堪分老夫猶要入修門

海棠

競艷嬌紅最是它教人嫌少不嫌多初酣曉日紅千滴晚
笑東風淡一渦自是花中無國色非關格外占春窠開時
慳與渠儂醉却恨飄零可若何

遊定林寺卽荆公讀書處

鍾山已在萬山深更過鍾山入定林穿盡松杉行盡石一

庵猶隔白雲岑

一個青童一蹇驢九年來往定林居
經綸枉被周公諛相罷歸來始讀書

踏月敲門訪病夫問來還是雪堂蘓
不知把燭高談許曾舉烏臺詩帳無

方虛日斜再行宿烏山

多稼邨邨過垂楊店店迎偶然逢客子
問得好山名投宿忻猶早斜陽落更明
僕人休進扇得似晚風清

過楊二渡

春迹無痕可得尋不將詩眼看春心
鶯邊楊柳鷗邊艸一日青來一日深

宿黃岡

我豈忘懷一畝居誰令愛讀數行書
秋南春北雁相似柳思花情鶯不如
上市魚蝦邨店酒帶花秋芥晚香蔬
長亭一醉非難事造物相撩莫管渠

明發周邨灣

不住寬鄉任甕門那知世上有乾坤
環將峻嶺包溪谷圍出餘天與別邨
茅屋相挨無著處花溪百摺不教奔
江淮地迥寒無價宜歛山寒更莫論

宜歛道中

天齊玉立萬孱顏三日溪行紫翠間
便是昨來千佛閣望中見此兩州山
詩家寒刮少陵骨宮樣高梳西子鬟
祇好

遙看莫登覽今晨登處鬢都斑

新安登江水自績溪發源

金陵江水只鹹腥敢望新安江
水清鰕底玻璃還解動瑩然
灑淥却消醒泉從山骨無泥
氣玉漱花汀作珮聲水記茶
經都未識謫仙句裏萬年名

太白云借問新安江見底何如此又云何謝新安水

手等見底清

晨炊泉水塘邨店無肉只買笋蕨朝亭父

屠門淡閉底須愁土銼無烟也莫羞
笋便落林猶勝肉蕨纔出土更燒油
萬錢下箸今安在一飯流匙飽卽休
吾道

藜羹元不糝至今諱殺古陳州

陳州人諱餒殺孔夫子

閭門外登溪船

步下新船試水初打頭攬載適逢予一椽板屋纔經雨兩
面油牕好讀書剩買春園紅芍藥亂簪棐几竹籬條清溪
浮取松亭子賞徧千山不要驢

芙蓉渡酒店前金沙芍藥盛開

山店春光也自妍芙蓉渡口數家邨荀與低過金沙架籬
落疎園芍藥軒孤客倦遊殊寂寞雨花作意與溫存可憐
經眼匆匆去不折紅香到綠尊

晨炊橫塘橋酒家小牕

饑望炊烟眼欲穿可人最是一清帘雙渠走水穿三店獨
樹欹流蔭兩簷牕扇透明仍挂土爐香未盡又多添山中
祗苦無良醞嫌殺芳醪似蜜甜

宿新豐坊咏瓶中牡丹因懷故園

客子泥塗正可憐
天香國色一枝鮮
雨中晚歛寒如此
燭底宵暄笑粲然
自覺玉容微婉軟
急將翠掌護嬋娟
江南也有新豐市
未羨賓王酌聖賢

三三徑

東園新開九徑
江梅海棠桃李橘杏紅梅碧桃芙蓉九種花木各植一徑
命曰三三徑云

三徑初開自蔣卿
再開三徑是淵明
誠齋庵有三三徑
一徑花開一徑行

枕上聞子規

半世經行怕子規
一聞一歎一霑衣
如今聽著渾如夢
我

自高眠汝自啼

六月將晦夜出凝歸門

暑裏街頭可久停
今宵無月也宵征
一天星點明歸路
十里荷香送出城
山轎聲聲柔艣緊
葛木眼眼野風清
五更月出還家下
不早相期作伴行

與侯子雲溪上晚步

人入溪園自柝門
溪流新落雨三痕
杖藜紫菊霜風徑
送眼丹楓夕照邨
行在忽然忘近遠
陰晴未肯定寒暄
多時不出今聊出
牧子樵兒一笑喧

寄題安福劉道協涌翠樓

讀書臺南山繞屋
恰是萬簪削青玉
讀書臺北山更多
又

似碧海躍萬波臺邊高人子劉子架樓南北山圍裏醉卧
領客上上頭忽驚平地翠浪浮一浪拋雲入天半衆浪翻
空溼銀漢碎轟打倒闌干前天跳地踔乾坤顛賓主拍手
呼釣船定眼看來還不然只是南北幾點山

同劉季游登天柱岡

兩箇胡牀小憇些一枝筇杖挂傾斜烟雲慘淡天將雪風
日荒寒梅未花人去客來沽酒市鷄鳴犬吠野人家清游
不用忙歸去強管行程是暮鴉

不睡

夜永無眠非爲茶無風燈影自橫斜擁裯俚面畫帷薄數
盡承塵一簾花

予與客嘗茶糜瀉酒客求其法因戲荅之

月中露下摘茶糜瀉酒銀瓶花倒垂若要花香熏酒骨莫
教玉醴溼瓊肌一杯墮我無何有百罰知君亦不辭勅賜
淡之能幾許野人時復一中之

至後入城道中雜興

畦蔬甘似卧沙羊正爲新經幾夜霜蘆菹過拳菘過膝北
風一路菜羹香

長亭阿姥短亭翁揆借桃花作面紅酒熟自嘗仍自賣一
生割據醉鄉中

進退格寄張功夫姜堯章

尤蕭范陸四詩翁此後誰當第一功新拜南湖爲上將更

牽白石作先鋒可憐公等俱癡絕不見詞人到老窮謝遣
管城僂已曉酒泉端欲乞移封

十二月二十七日立春夜不寐

冬夜嫌長只望春春宵又永更何言睫梢強合終無睡脚
底相摩也不溫竟夕松風聽到曉半明燈火看來昏擁裯
却起蒙頭坐顧影真成一病猿

除夕送次公子入京受縣

過眼光陰又歲窮相看父子一尊同春回雨點溪聲裏人
醉梅花竹影中汝趨暄和朝北闕我扶藜病見東風弟兄
努力思報國放我滄浪作釣翁

十月四日同子文克信子潛子蓮材翁子立諸弟訪

三十二叔祖於小蓬萊酌酒摘金橘小集戲成長句
誠齋老子不奈靜偶拄烏藤出苔徑獨遊無伴却成愁羣
從同行還起興每過一家添一人須臾保社如烟雲寒棠
涉溪溪水淺著履渡橋橋柱新蓬萊一點出城外南溪聚
在千花裏芙蓉照波上下紅琅玕繞屋東西翠槿籬竹月
重復重鷄鳴犬吠青霞中蓬萊老仙出迎客朱顏綠髮仍
方瞳餐菊爲糧露爲醕染霧作巾雲作屨忻然領客到仙
家行盡蓬萊日未斜更傾山瓢酌山酒酒外瓢邊亦何有
偶看小樹雙團欒碧琉璃葉黃金丸主人忍喫不忍摘笑
道未霜猶帶酸小童隨我勇過我不管仙翁惜仙果手撓
風枝揀霜顆爭獻滿盤來釘坐隔水蓬萊看絕奇蓬萊看

水海如池主人勸客對絕境不飲令僕坐生癢何如寄下
未盡瓢甌待蚤梅賞疎影

秋涼晚酌

寄老山林度懶殘新秋又是一年年青編翠竹風聽月白
酒紅葉木檻天暑欲謝時偏更毒僕當醉後想渠顛古稀
尚隔來年在且嚼今宵藥玉船

乙卯春日三徑行散有感

東園一日走千尋又見飛龍第一春桃李成陰僕已老江
山依舊歲還新穿花踏影渾無日隔徑聞聲不見人學省
同寮各星散白雲山裏作閑身

十一月朔早起

拋笏投簪四見秋官情世味兩俱休塵隨日影穿牕戲葉
卷風聲刮地愁文武自勻香底火聖賢教帶老時愁夜來
富貴非人世夢釣滄浪雪滿舟

積雨小霽

雨足山雲半欲開新秧猶待小暄催一雙百舌花梢語四
顧無人忽下來

久雨妨於農收因訪予上有歎

君能過我意如傾我每看君脚便輕若爲泥塗間還在端
令老病底心情未霜楊柳秋猶碧旣水芙蓉晚更明早歲
嫌晴不嫌熱今年教熟不教晴